

PABLO NAAJIONEE COLOSA TIACAJINIA QUINIAA PUEYASO PUEYACUARA

**Pablo Colosa tiacajinia Pueyaso pueya
maanuucuaa naajioquiaari**

1 ¹¿Niaate quiyajaa, Colosa tiacajinia
quiniaa cuarta Pueyaso pueyanaa?
Janiyari Pabloni, Jesucristo jiyaramiqui-
shano na rupaa pohuatariquiano taa na
Que Pueyaso paniquiaaricuajani. Pa
tarajanu Timoteota naajiya nionijia.

²Niaacuara naajiyanjia, canapue Pueyaso
saquiriojoquiaaricuajani tama nerajajaa
nia quiniuria. Nijaniyacuajaari maninia
tiuquuaa Pueyasooqua, Cristo rupesano
nia quishacari. Pa Que Pueyaso cuaara
cumaquiiria nijaniya, shuquiriaatia nia
quiniuria, juhuajaniya nioojia quiniuria-
juhuaj.

**Pablo secojosano Jesuucua
tiuuniaa pueyacuara**

³⁻⁴Canaari pohuatasaaanuni taa nia
tiuquuaa Jesucristoocuaani, naajuhuaj,
taa nia paniya puetunu niarta Pueyaso
muerasujuanaani. Naaratej, pueyaraca-
nu canaa secojosacari Pueyaso niaacuara,
canaari na sequequiaani: “Paacarasho
canaa Quenaa”. ⁵Niaari naa maninia
quiyatej, nia niishishacari Pueyasoori
jiyanohua maninia pa miiniutianiya na
niqitiosacari pajaniya jiyocuacaanu na
jiitiasanojiniji. Niaacuajaari naa pohuata-
saaquiaari tarijiatej, shushajanaa nia
tojishacari seetanu Pueyaso rupaajanaa.

⁶Cuno maninia rupaari puetunu jiyacaji-

nijanaa paaqueyaree, mariyata taa na
paaquecanucuaa na pohuatasacari nia
tiacajiniacuaani. Pueyaso Rupaari
maninia caneyaree queraatia pueya
jiuujiajinia, mariyata taa na caneya
nioojiacajiniacuaani. Naa caneyari nia
niishishacari Pueyasoori seetanujuanaa
pa paniya, taa nia pohuatasaaquiaaricua-
jani. ⁷Pa panishano Epafrasri naa
pohuataquiaari nijaniyatej. Nojuajaari
Pueyasora poonijiona, juhua canaa.
Nojuajaari canaa niti poonijioriquiaa
niaara. ⁸Nojuajaari canaa pohuatarucuaa
nijaniyajiniji, naajuhuaj taa Pueyaso
Sohuanu panitiooteya nijaniyani.

⁹Naaratej, canaa jaara tojiqiuana
nijaniyajinijini, majaari canaa tarinitia-
nu quiriqiaa Pueyaso secojonu
niaacuara. Canaari Pueyaso secojoquiaa-
ni, nojuaja cuaara nia jataniiria
niishijiara nia quiniuria na Sohuanu
cumaacata. Canaari naa secojoquiaani,
maninia nia niishiniuria taa Pueyaso
paniya maninia nia quiniuriani, maninia
nia miiniuriahuhuaj. ¹⁰Niaa jaara Pueyaso
panishano niishijiaca quiri, naacuajitij,
niaari maninia quiniutianiya taa pa
Jiyanjia paniya na pueya quiniuriacua-
jani, nojuaja shuquiritianura nijaniya,
pueyaracaanu maninia nia quishacari.
Niaari puetunu maninia casaajanaa
miiniutianiya. Naajuhuaj, niaari socua
maninia niishiniutianiya Pueyaso.

¹¹Canaari Pueyaso secojoquiaa niaacuara-

juhuaj, Pueyaso cumaquiniuria niajaniya puetunu na cumaacatajanaa. Jiyanojua maniniaari na cumaaca, shuquiriaatia nia rejeretanura juhuajaniya puetunu casaajanaa. ¹²Canaari Pueyaso secojoquiaajuhua niaa cuaara pueyara-caanu sequeera nia shuquiriniutia “paacarasho”, pa Que Pueyaso miishano-jiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jiitiasanojiniji pajaniyara, cuhuashiqui quiquiojinia pa quishacari. ¹³Pueyasoori ninishiquiji pa jayoquiaari, maja Sesaaca jiitianura socua pajaniya. Pa jiyatereeri cuhuashiqui quijiaca pa quiniuria, Neyanuniyojua jiitiasano pa quiniuria maninia cutara. ¹⁴Tama Neyanu cusonutajaaja pa jiyanooriiri sesa pa miishanojiniji. Naacuajitij, paari na pueyara jatanishaareeni.

**Paari maninia quiya Pueyasotani,
Cristo cusonuucua pa niti**

¹⁵Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujuanaa quiquiaari Pueyaso shipiniyaquishacarijia puetunu casaajanaa. ¹⁶Na Que Pueyasoori na shipinitiquiaari puetunu casaajanaa jiya cajiniocua, mijiriano; niquishano casaa, niquiyaquishoo casaanio. Naacuajitij, Cristoori puetunu tamonu cumaacaraca quijiacaajanaa shipiniquiaari tama nerajaaja. Nojori shipiniquiaariiri nojori jiitianura nera jiyocuacaanu casaa, jiyocuacaanu quijiacanio, mariyata mijiria casaa, mijiria quijiacanio. Nojuajaari puetunujuanaa shipiniquiaari. Tama nerajaaja na shipiniquiaariiri. ¹⁷Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuanaa cojuaa, maninia na

quiniuria. ¹⁸Cristoori Pueyaso muerasu Jiyaniijiajuhuaj, taa poojia quiya pa cuaqueya jiyaniijiacuaani. Puetunu Pueyaso muerasujuaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samiitianijia, juhua na cuaqueya pa quishacari. Nojuajaari coteenu samiitiaquiaariuhua macujiniji, juhua Pueyaso jiyapueranu na quiniuria. Naacuajitij, Cristoori coteenu quijia. Nojuajaari Jiyaniijiajuhuanaj. ¹⁹Pueyasoori paniquiaari Neyanu Cristo jiitianura puetunu tama na cumaacajanaa, juhua nojuaja na quiniuriajuhuaj. Naacuajitij, Cristoori maja rimiajata quenaaja na quiniu na Quejiniji. ²⁰Naajuhua, Pueyasoori paniquiaari Cristo rupuetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jiyanootiiaari puetunu casaajanaa tama na cusonutajaaja niyacutesanojinia. Na Que ruputequiaariuhua puetunu casaajanaari, jiyocuacaanu casaa, mijiria casaanio.

²¹Tarijia, niaari Pueyaso paraa quiquiaari, juhua taanuusano pueya Pueyasojiniji, sesa miijiaca nia quiniucua. ²²Saniniuujia quiarijiani, Pueyasoori nia ruputequiaariuhua nocua, Cristo cusonuucua pocuara, cuaqueyaraca na quishacari mijiria. Naacuajitij, Pueyasoori na naata nia tiuquininiu nocua, tojetaarucujanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianiyojua sesa nia quiniu quiniutianiya na niquiara. ²³Niaari naa quiniutianiya maninia, niaa jaara cumaatia rupaaquiaa Cristoocua, nocua nia tiuushacari, nioojia nia niquijioteya-quiniutia. Majaari nia niishiriojonu Pueyaso naasucuaari maja na miiniu

quiniutianiya puetunu na sequesanojua-naa niaara, taa nia tojiqiaaarucajani. Nia tojishano Pueyaso rupaacuaajaari tari pohuatasaacanu puetunu jiyacajiniajanaa. Janiya, Pablóni, janiyari na pohuatanu naacutaajaaniuhuj.

**Pablo Pueyaso pueya maanu
cumaquiniara jiyatesaaquiaari**

²⁴Cristoori naquiya miishaaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa pa pohuatasacari, puetunu na saquiriojosano pueyajanaa tiuuniuria nocuajuhuj. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniji cua pohuatanuucua tiquiyocuatej, janiyari Cristo naquiya miiniu tucataa tama cua cuaqueyajiniajaajani. ²⁵Pueyasocuaajaari cua jiyatequiaari na saquiriojosano pueya cua jiitianura, cua cumaquiniuria nijaniya puetunu na rupaatajanaa. ²⁶Cuno rupaari saaja Pueyaso jiyasohua niishishano quiquiaari tarijia. Majaari na pohuatanu quiquiaari supuetana pueya, tariucuaacanu quijiaca. Quiari naataja cutara, Pueyasoori jiyasohua na rupaa niishitiquiaari tama na saquiriojosano pueyarajaaja. ²⁷Pueyasoori pa niishitiniu paniquiaari taa jianohua shacantuuca na cumaaca quiya nijaniyarani, canapute maja na saquiriojosano Judiucuaa quiquiaaarucajani. Niocuaajaari jiyasohua Pueyaso miiniu panishano tarijia: ¡Cristoori nioojiajinia quiya! Nia jiitiasacari Cristo, niaari niishiya niaari shacantuuca quijara jatanishaanutaniyajuhaaj.

²⁸Naaratej, Cristocuaajaari canaa pohuatasano. Canaari puetunu pueyajanaa nacasuquiaani. Canaari nojori niishitioquiaani puetunu canaa niishishanotajanaa, maninia Pueyaso

muerasu nojori quiniuria, juhua tojetaarucujanaa maninia canashitishano pueya, Cristo rupuesano nojori quishacari. ²⁹Naaratej, puetunu Cristo niquitiosano cumaacatajanaa jiyanojua poonijioquiaanijia, na cumaquishacari janiya.

2 ¹Pueyanaa, janiyari paniyani nia niishiniuria taa jiyanojua cua poonijioquiaa Pueyaso cua secojonuta niaacuarani, Pueyaso muerasuucua Laodicea tiacajiniajuhuaj, puetunu juhuanojuaja cua niquiyaquiniaa pueyacuarajanaano. ²Jiyanojua secojoquiaa niaacuaranijia, nioojiaca cumaquishaanura, nioojiaca rupuetoonura jatiqiujuhuaj, jiyanojua nia panitiosacari. Naajuhuj, secojoquiaanijia maninia niishijiacara nia quiniuria, maninia nia niishiniuria tariucuaacanu Pueyaso niishishano tamajaaja, taa Neyanu seera maninia na miiniutianiya pajaniyani. ³Neyanu Cristocuaajaari puetunu niishijiajanaa. Majaari tamonu niishijia quiniu juhua nojuaja. Jiyanojua maninia miiijia puetunu na niishishanotajanaari. ⁴Janiyari nio sequeya nijaniyani, tamonu mariqui nia sapojoreeri najuhuaana tamaatia na pohuatasanota. ⁵Majaari cua quiniu quiquiaa niaata. Naajaa, cua sohanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujuaanaa maninia nia tiuushacari Cristoocua, maja jatasano nia quiniuria.

⁶Niaacuajaari pa Jiyaniijia Jesucristo masequiaari, nia jiyaniijia na quiniuria. Naaratej, pueyaracaanu maninia nia rupuerenoj, maninia nia quiniuria mijiria na cumaacata. ⁷Maninia nia rupuetooore Cristota, naatej, taa naana cumaatia nujuacuuaani, jaara tucuaamaa nujuacacara quiri. Naacuajitij, majaari nia naata jatasano quiniu, maninia nia tiuushacari nocua, taa nia niishitiojosaaquiaaarucaja-

ni. Cunora, pueyaracaanu nia sequeriquia Pueyaso: “Paacarasho canaa Quenaa”.

**Niaari quiarinio pueya,
Cristo quishacari nioojiajinia**

⁸Tama nia cuaqueyajaaja nia cojuare, tamasaca mariqui nia sapojoreeri tamaatia nojori niishishanota najuhuanaj. Niaa jaara nojori niishitiojosano tojitariquia, niaari juhua nojori quioosano pueya quiniutianiya. Nojori niishishanoori maja Cristojiniji. Nojori niishishanoori saaja mijiria niishishano, supuetanaa pohuatasano najuhuanajuhua.

⁹Nocuaji saaja Cristo nia tojiri. Tama Cristo cutarajarijia puetunu Pueyaso cumaacajanaa jiitiaja, puetunu na niishitiajajanaano. ¹⁰Naajuhua, niaari Pueyaso cumaaca jiitiaa, na niishitiajajano, nia rupesacari Cristo. Naacuajitij, niaari puetunu nia panishanojuanaa jiitiaa tari, maninia quijia nia quiniuria. Cristojunaari Jiyaniijajanaa. Cristo jaara na jiyare, puetunu tamonu cumaacaraca quijiacajanaari na tojitiaa; jiyocuacaanu camarnu, mijiria camarnunio. ¹¹Cristo nia rupesacari, niaari seetanujanaa jatanishaaree maja sesa nia quiniuria socua. Majaari nareja nia cararaatiuuquia co mialesaanu quiquiaari, taa Judiocuaca miiquiaacuaani. Nojoriiri mialesaquiiaa nojori niishiniuria nojori cuaara quiiria saa Pueyasoraja, maja sesa miijia nojori quiniuria socua. Cuno, miatenuni, majaari pueyano na jataniniu sesa na miiniujiniji. Cristo cutaraari sesa nioojia jataquiari, seetanujanaa sesa nia quiniu jatasaanura puetunujanaa. ¹²Puetunu sesa nia quiniujianaari juhua jamosaquiari Cristota, niaa jaara moojinia tiuquinijiosaare. Nia tohuatasacariuhua, niaari juhua samiitianishaarohua Cristota, Pueyaso cumaaca nia tiushacari. Niaari samiitianishaarohua taa Pueyaso

samiitianiquiaariuhua Cristocuaani.

¹³Niaari juhua macu quiquiaari tarjia, sesa miijiaca nia quishacarijia, sesa jiuujiaraca nia quishacarijiano. Jiyacari-tij, Pueyasoori nia samiitianiquiaari Cristota, na jiyanooshacari njajaniya puetunu sesa nia miishanojinijijianaa.

¹⁴Pa tojijaquishacari tariucuacaanu Pueyaso rootasano, paari puecoosocoriquiano quiquiaari juucuan. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiari puetunujanaa. Pueyasoori puetunu sesa pa miishanojuanaa tiutiaquiari Cristocua. Cristo teetesacari niyacutesanojinia, puetunu sesa pa miishanojuanaari cuniqui puequequiari. Naa Cristo miishacari pocuaratej, majaari sesa pa miishano tiutiasaanu pocua. ¹⁵Nacususacari niyacutesanojinia, Cristoori puetunu tamasaca sesa cumaacaraca quijiacajanaa shocotaquiari. Nojori cumaaca jaariutiareeri. Nojori rerequete-reeri, naatej, taa quioosano pueya jaatucunuusaaquiacaani, pueya niquiara macaatisocoriquiano.

Saaja Pueyaso casaacua nia jiaatiariquia

¹⁶Naaratej, majaari nia tojinu noo pojori, canapuate nia tojitiniu saniniujiya supuetana niishitiojosanocujani. Nojoriiri najuhua niishitiojoquiiaa casa sumatuute puereshiyani, rusanonio. Nojoriiri niishitiojoquiiaajuhua teyano juucate poonijiaquishiyani, naajuhua, Pueyaso niquiara pa queranacunuunura raca macura. Nojoriiri naa niishitiojonuuquiaa nojori jyanishacari paa jaara naa miyaquirini, Pueyaso mariqui pa saniitio-reeri. ¹⁷Puetunu cuno supuetanaa niishitiojosanojuanaari tariucuacaanu quiquiaari, miriqui na niishitiojonura pueya taate seetanujanaa quiniutianiya ni Niriqiano jaara tiuquiri. Cuno

Niriquianocuaajaari Cristo. Tari tiuquiquiaariiri. Nojuajaari pocuaji Tacuna. Naaratej, majaari socua pa tojiniu cuno miriqui niishitiojosano. Quiarijia saaja Cristo pa tojiri cutara. ¹⁸Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niqutionu panishano niajaniya maseya-quiriiri. Nojoriiri tama na cuaqueyajaaja shuquiritiaquiaa na jianishacari nojori maja Pueyaso shocotaja na quiniu nojori secojosacari Pueyaso seya, maja Pueyaso-juanaa. Nojoriiri tama na maquenujinia na niuishanoocuaajaaja tiuujiaca, maja Pueyaso rupaacua. Naacujatij, nojori tiuushacari tama na niishiriojosanoocua-jaaja, nojoriiri seetanujanaa pueya shocotajaca quiya. ¹⁹Nojoriiri maja na rupueno Cristo, juhua poojia Cristo quishacari, na cuaqueya pa quishacarijiu-huaj. Paa jaara maninia rupuetesano quiri poojiatani, poojiari maninia maashitiya puetunu pa cuaqueyajanaa, paa jaara maninia rupuetoonu quiya puetunu pa nucuhuatajanaani, pa cusorohuatano. Pueyasoori naa pa maashitiniu panijajuhuaj Cristota rupuetootesano pa quishacari.

²⁰Niaari juhua tari cusoquiaari Cristota, maja socua juhua mijiria quijiaca nia quiniuria. ¿Macutucua taa supuetana rootasano tojirini? Maja na naata. ¿Niajanियariuhuaj? ¿Casaara nia tojitiaa-jaa cuno tariucuacaanu rootasanoni? Niaari juhua nareja mijiria quiniaa quiyajaa, nia tojishacarijia cuno rootasano. ²¹Supuetanaari naa piriyojoquiaritij: “Maja pa quianu cuno. Maja pa miaque-nu cunojuhuaj. Maja cuno pa cooniu”. Pa supuetanaari naa sequejatej. ²²Naajaa, puetunu cuno pueresano casaajanaari saaja shaajeja pa seecojinia. Majaari poojia na miiniu sesa. Cuno tariucuacaanu rootasanoori saaja tama pueya

niishishanojuajaaja quiquiaari. ²³Paa naasucuaari jiyaniyani cuno rootasanoori maninia quiya Pueyaso shuquiritianura pajaniya socua. ¿Paatucua socua maninia pueya quirini paa jaara casaa sumatuu puerereni, naajuhuaj, paa jaara naquiya miiri tama pa cuaqueyajaajani casaa pa puerenutani? Maja. Pa pueresacari casaa, cunoori najuhuaana Pueyasora. Cunoori maja na naacunu pajaniya sesa casaacua pa jiaatiaaquiniuria.

3 ¹Niaa jaara samiitianishaaquiaari Cristota, jiyocuacaanu Pueyaso jiitiasanoocua nia jiaatiare, tee Cristo cajiya na Que Pueyaso miaquetajaracua-jani. ²Pueyaso casaacua nia niishiriojore saaja, maja mijiria casaacua. ³Puetunu tarijia sesa nia quiniujianaari tari juhua jamosaaquiaari, niaa jaara Cristo cusonu jiyatere tama nia nitijiaaja. Quiarijiani, niaari saminio quiya nia rupuesacari Pueyaso, Neyanu Cristota. Nojuacuajaari pa samiitianijia. Saniniuujiaca, juhuanojua-ja maja niishishano taamueca quijiaca pa cuaqueya quiniutianiyani. ⁴Cristo jaara muetarahua pocua mijiria, shacantuuca cumaacaraca quijia na quishacari, jiyacaritij, paari jatanishaanutaniyani shacantuuca cumaacaraca quijiaca pa quiniuria nata, juhua nojuajuhuaj.

Maninia rootasano Pueyaso muerasura

⁵Naaratej, nia cuaqueya cuaara quiiria juhua macu tama nia niquiarajaaja, nia cuaqueya nia ruuretanura na jiaatiasacari sesa miiniuucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitianio. Nia cartere puetunu sesa miiniuucua nia jiaatiasanojuanaa. Maja sesa casaacua nia jiaatianu. Maja puera casamicua nia jiaatianu. Casaacua jiaatijaari juhua Pueyaso ruuretaja quiya, tama na jiitiasano casaacuajaaja na tiuushacari juhua Pueyasooacua.

⁶Pueyasoori jiyanhua saniitionutaniya na tojiyashijiaca, canaputee naa sesa quijiacacujani. ⁷Pueyaso tojiyashijiaca nia quishacari tarijia, niaari naa sesa mijiaca quiquiaari. ⁸Quiarijiani, nia tarinitiare puetunu naa sesa nia quiniujianaa. Maja juaajia nia quiniu. Maja naseeca pueyano nia quiniu. Maja jiyanyashijia nia quiniu. Maja sesa mijiaca nia quiniu. Maja pueya sesacaja nia quiniu. Maja sacuaraatia najuhua nia niti taquiriocuateja nia quiniu. ⁹Maja nia cuaracashjiotoonu. Niaari tari jatanishaaquiaari tarijia sesa nia quiniujiniji, sesa jiuujiaraca nia quishacarijia, sesa miiniucua jiitinio nia quishacarijiuhua. ¹⁰Niaari quiarinio jiuujiaraca quijia tari. Quiarijiani, tama nia cuaqueyajaarijia tari jataa juhua nia Shipinina Pueyaso nia quiniuria, seetanujanaa Pueyaso niishijia nia quiniuria. ¹¹Pueyaso jatanishano pueya pa quishacari quiarijiani, majaari tari rimiajata pa quiniu, paa jaara Judiocuaca quiyani, tamasaca pueyano; na cararaa-tiuuquia co miatesano pueya, miatesoo pueyano. Paa jaara tahue quiyani, juhua mococori, poonijioesano pueya, camarnuuju pueyano, naajaa. Cristo pa rupesacari, puetunu pajaniyajanaari mariyata na muerasu quiyani. Nojuajaari puetunu poojiajina quiyajuhua.

¹²Pueyasoori nia saquiriojoquiaari saa maninia nia quiniuria nera. Nijaniyari na panishano muerasu. Naaratej, pueyacua taraajeja nia quiri. Maninia mijiaca nia quiri. Majaari nia jiyaniniu tama nia cuaqueyajaarijia socua maninia tamonujiniji. Maja juaajia nia quiniu. Jacaria pocuaja nia quiri. ¹³Jacaria nacasutoojua nia quiri. Maninia nia jiyanoori cante sesa miirii najaniyani. Taa pa Jiyaniijia jiyanooquiaari pajaniyacuaani, naa nia jiyanoootioorejuhua. ¹⁴Seetanujanaa pueya panijia nia

quirijiuhuaj. Cunoori socua jiyanhua panishano. Panitiojuaca nia quishacari, puetunu nia miishanojuanaari jiyanhua maninia quiniutianiya, jatiqui nia quiniuriajuhuaj. ¹⁵Naajuhua, Pueyaso nia shanacure nioojia na cajitiniuria pueyaracaanu. Nojuacuajaari nia saquiriojoquiaari juhuajaniya quijia nia quiniuria, maninia rupuetootesano. Pueyaso muerasu cuaara jatiqui poonijionuujuaca quiria, naatej, taa pa cuaqueyajiniacuma casaa puetunujanaa jatiqui quiyacuani. Majaari nia juaatoojonu. Naajuhua, Pueyaso nia shuquiritiare pueyaracaanu, puetunu maninia na miishanojinijijianaa niaara.

¹⁶Nioojia cuaara quiria mishaja Cristo rupaata, jiyanhua na tojijia nia quiniuria. Pueyaso Rupaa nia niishitiojotoore nia jaaquequejosanota. Naa nia cumaquitiojore puetunu Cristo niishishanotajanaa. Nia jaaquequejonuu-re Pueyaso Rupaa naajiosanojiniji, pueya naajiosanojinijiuhuaj, Pueyaso Sohanu niishitiojosano najaniyani. Naa nia jaaquequejore Pueyasora, nia shuquiritina nia nojuaja. ¹⁷Jesucristocuaajia nia Jiyaniijia quiya. Naacujitij, niaari na sesaanucua. Naaratej, nia sequesano, nia miishanojuhua, puetunu cunojuanaa cuaara quiria maninia nera. Naa nia miiriquia pa Que Pueyaso nia sequenuta “paacarasho”, Neyanu cumaquiniucua nijaniya.

Maninia mijiaca pa quiri Pueyaso muerasu pa quishacari

¹⁸Maajipohuanaa, nia niyaca tojitiajaca nia quiri. Pa Jiyaniijiaacua tiuujiaca cumaati naa miiquiaaquij. ¹⁹Pueyanaa, nia niquiocua nia paniri. Majaari na juuanu. ²⁰Mueraasapuenaa, nia queya tojijia nia quiri, nia shuquiritiniuria pa Jiyaniijia. ²¹Pueyanaa, maja nia juaatini nia niquiohua, nojori mairiqui maninia

miiniuucujaji pishiriiri, puera nia juaashacari nojori. ²²Poonitijosano pueyanaa, puetunu nia camarnu sequesanojuanaa nia tojiri. Maja na tojjia nia quiniu saaja na shootiasacari niajaniya, na shuquiritianura niajaniya. Majaari saaja na niquishacari nia poonijionu nia sapojonura nojuaja. Seetanujuanaa maninia nia poonijiore pueyaracaanu nia puerenuta saniya nia camarnujuanaa Pueyaso.

²³Puetunu nia miishanojuanaa nia miiri shitimia, juhua pa Jiyaniijia Cristora. Naa nia miiritij, maja juhua nareja pueyara.

²⁴Maja nia niyajetanu, pa Jiyaniijiaari nia niqutionutaniya jiyocuacaanu niaara na jiitiasanojiniji. Mijiria camarnura nia poonijosacari, niaa cutaraari Cristora poonijiya. Nojuacuajaari nia camarnujanaa. ²⁵Pueyasoori sesa mijia saniitionutaniya cutara, sesa nojori miishanojiniji. Pueyasoori maja rimiajata saniniujuja. Mijiria camarucua, poonitijosano pueyano, naajaa, nojoriiri maja rimiajata Pueyasora.

4 ¹Camarucuaana, pueyaracaanu maninia nia miiriquia nia poonitijosano pueya. Majaari nojori nia miiniu sesa. Maja nia niyajetanu, niaari jiyocuaaanu Camarnuracajuhua.

²Pueyanaa, Pueyaso secojojua nia quiri pueyaracaanu. Nia secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, “paacara-sho”. ³Naajuhua, canaacuara nia secojore Pueyaso, nojuaja cuara canaa pohuata-niiria pueya niquiara na rupaa Cristojiniji. Majaari pueya niishiniu quiquiaari tarjia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano niya quianijia nio nujuatejojuajinia. ⁴Pueyaso nia secojore cucuara, maninia cua pohuatanura Cristojiniji, pueya niishiniuria maninia cua pohuatasano, taa Pueyaso paniya cua pohuatanuracujani.

⁵Maninia nia niishiriojore taa nia miiniutaniya noo pojorini, canapuetucuaaja maja Pueyaso muerasuni. Maninia nia miiri nojori, mijiria nia quishacarjia. ⁶Nia pocoojosacari nojoritia, maja najuhuana nia pocuanu. Pueya nia cumaquiri nia sequesanta. Nia niishiriojore taa nia riucuanutaniya tamasa pueyani, nojori jaara nequesotariquia niajaniya Pueyasooqua nia tiuniujiniji.

Nata quiniaata Pablo saruhuatasacari pueya, naajionu na puecanura

⁷Pa panishano pa tarajanu Tíquicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyaniijia canaa poonijionura. ⁸Niaacua na jiyaroyanjia na pohuatanura niajaniya taa canaa quiyani, naajuhua, na cumanijianura niajaniya. ⁹Pa panishano Onésimoori nata quianutaniyajuhua. Nojuacuajaari niajaniyajinijinio pueyano. Maninia poonijiojua Pueyasora. Nojoricuajaari nia pohuatanutaniya puetunu niiquijijianaa.

¹⁰Aristarco, cuata nujuatesano pueyanoni, nojuajaari cua sequeya cua saruhuatanura niajaniya nera. Marcoori nia saruhuataajuhua. Nojuajaari Bernabé cuna. Niaacuajaari tari rootasaacanu Marcojiniji. Nojuaja jaara niaacua quiaare, niocua maninia na tiuquiniri nia tiajinia. ¹¹Jesu sesaanucua pueyanoori nia saruhuataajuhua. Na sesaari Justojuhua. Saa nio pojorijia Judiocuacajinijinioori cuata poonijioquiaa Pueyasora, canaa niishitiojonura Cristojiniji pueya niquiara. Nojoriiri cua cumanijianaa quiquiaa. ¹²Epafras nia saruhuataajuhua. Nojuajaari Cristo seru niajaniyajinijiojuhua. Nojuajaari pueyaracaanu niaacuara secojoquiaa queraatia, jiyanoqua cumaatia Pueyasooqua tiuujiaca nia quiniuria.

Secojoquiaajaariuhua ritia Pueyaso tojijiaca nia quiniuria, puetunu Pueyaso panishanojuanaa nia miiniuria maninia. ¹³Seetanujuanaa, Epafrasri jiyanoehua tacaquiaa niaacua, Laodicea tiacajinia quiniaa Pueyaso muerasuucujuhuj, Hierápolis tiacajinia Pueyaso muerasuucuanio. ¹⁴Pa panishano naarajona Lucasri nia saruhuataa. Demas nia saruhuataajuhuj.

¹⁵Canaara nia saruhuatare Laodicea tiacajinia quiniaa parta Pueyaso muerasu. Ninfas nia saruhuatarejuhuaj, na tiajinia rerejonaa Pueyaso pueya maanujuhuj. ¹⁶Niaa jaara nio naajionee serojorecuaa nia rerejosacari, Laodicea tiacajinia nia jiyarotarejuhuaj, cuaara

serojosaaria Pueyaso pueya maanu niquiara tiijihuj. Naajuhuj, cua naajionee Laodicea pueyacuara nia serojore, niaacua nojori jiyarotasacari Laodicea tiacajiniji. ¹⁷Naa Arquipo nia sequere quiria: “Tama quia cuaqueyajaja quia cojuare quia tucuanura quia poonijosano pa Jiyaniijia. Nojuajaari quia jiyatequiaari nera poonijioriquiano”.

¹⁸Janiyari Pabloni. Quiarijiani, tama cua juaashiquitataaja naajiyanjia saaja cua saruhuatanura njajaniya. Nia niishiriquia, janiyari moronucua nujuatesano quiyani. Pueyaso cuaara cumaquiiria njajaniya na cumaacata jiyanoehua. Tariucujaja.